

FCCA ta huur cas adapta pa cuido situa na Cura Cabay na Stichting HOPE



RECIENTEMENTE, Fundacion Cas pa Comunidad Arubano FCCA a firma un contrato di huur pa su edificio (cas) situa na Cura Cabay cu Stichting HOPE, Helping Our Precious Elderly Foundation.

Stichting HOPE, bou di un maneho nobo, lo huur e edificio na Cura Cabay, conoci antes pa e cas blauw, cas di difunto Ho Sin Loy, cual cas ta adapta pa por cuida nos grandinan.

Despues cu pa algun tempo e cas tabata ge-huur cu un otro organisacion cu a duna e servicio aki y despues pa un tempo cortico dor di Wit Gele Kruis, FCCA a ricibi e peticion di Stichting HOPE cu tabata hopi interesa pa por expande nan servicio di cuido na nos grandinan.

Ya Stichting HOPE ta opera den un otro cas na Tanki Leendert y esaki ta completamente yen. Señora Miranda Pilage y señor Oslwald Trimon ta esnan cu tin e maneho awo di Stichting HOPE. Personanan cu amplio experiencia den cuido, y especialmente cuido di hende grandi, dor di a haci e trabou aki pa varios aña na Hulanda.

Pa FCCA ta di sumo importancia cu e huurdo di su casnan adapta pa e meta aki y esnan cu ta bay duna e servicio ta riba un nivel halto den e ramo. Cuido di nos grandinan ta un trabou nobel, no facil, pero cu si mester wordo hasi bon y responsabel.

E biaha aki Wit Gele Kruis a yuda FCCA cu evaluacion di e Stichting aki prome cu a dicidi pa bay over na firma e contract. Señora Pilage y señor Trimon tabata hopi entusiasma na momento di a compromete cu FCCA pa huur e edificio y tabata pura pa a cuminsa cu e servicio di cuido. Wit Gele Kruis a compromete pa haci control di e calidad di cuido cu ta bay wordo ofreci dor di Stichting HOPE.

Durante e añanan FCCA a tuma nota cu tin bastante peticion pa casnan pa nos grandinan, y tambe pa cupo den e casnan di cuido. Y logicamente esey ta sosode door cu e hende ta biba mas aña. E asina yama "Vergrijzing". E fenomeno aki a pone FCCA bay concentra tambe rib'e tipo di proyectonan asina. Un di prome proyecto den e estilo aki ta situa na Paradera.

Tambe den e proyecto aki tin un cas di cuido, na unda varios di nos ciudadano 60 plus ta biba y ta ricibi cuido dor di un instancia. FCCA tin por lo menos dos di e tipo di proyecto aki den fase di inicio.

E contrato di huur di e edificio a wordo firma dor di e directornan di FCCA, Señor Peter van Poppel y señora Maria Cristina Laclé y pa Stichting HOPE Señora Miranda Pilage y señor Oslwald Trimon. FCCA kier a desea Stichting HOPE tur clase di exito cu e maneho di cuido den e cas na Cura Cabay.